

In derbi da prestisch

La pli interessanta partida dil campiunadi da ballapei regiunal da questa fin d'jamna ei franc il derbi sursilvan da 3. ligia. Trun/Rabius retscheiva dumengia proxima Schluein Glion. Igl atun ha la squadra dalla Foppa gudignau cun 2:1 quella scuntrada.

Da Hans Huonder/FMR

Derbis ein buca giugs da campiunadi ordinaris. Els ensieran la finamira da recaltgar puncts encunter il rival dalla regiun. El cass da Trun/Rabius e Schluein Glion ei quei scuntradas cun liunga tradiziun. Pli baul era quei buc il sulet derbi sursilvan dalla 3. ligia, cu autras equipas sco Lumnezia, Danis-Tavanasa ni aunc pli baul Laax, Rabius ni era Rueun eran da cattar en quella ligia.

Buna partenza el campiunadi

Ton a Schluein Glion sco Trun/Rabius ei la partenza el campiunadi dalla primavera reussius. Schluein Glion ha battiu Triesen ordeifer. Damai che Valposchiavo ha spiars siu giug a Schaan han ils Sursilvans surpriu la testa dalla tabella. Valposchiavo ha medemamein 29 puncts, Ruggel dus pli pauc e Triesenberg treis pli pauc. Il campiunadi resta pia plein tensiun. Cun in remis ordeifer encunter Triesenberg ha Trun/Rabius medemamein giu ina buna partenza. Omisduas equipas paran d'esser sepreparadas bein pil campiunadi, aschia ch'ils aspectaturs astgan spitgar in bien, intensiv ed interessant giug dumengia suentermiezdi a Trun/Pustget. Schluein Glion basegna puncts per defender la testa dalla tabella e Trun/Rabius less aunc contonscher igl emprem miez dalla tabella per la fin dalla stagiun. Per lezza finamira drova ei in tshuppel puncts. Il giug da dumengia proxima ei dil reminent era il duel da dus trenaders che han dau sezs biars onns cun success ella 3. ligia: *Roland Decurtins* da Trun/Rabius e *Corsin Cavegn* da Schluein Glion.

Entschatta era en 4. e 5. ligia

Suenter che las equipas dalla 3. ligia han entschiet il campiunadi avon in'jamna, vegnan uss era quellas da ligias pli bassas, junioras e juniors en acziun. Gia oz, venderdis, retscheiva Schluein Glion l'equipa da Cuera 97 el giug dalla grupp 1 dalla 4. ligia. L'equipa dalla capitala grischuna ei sil secund plaz dalla tabella cun tuttina biars puncts sco il capograppa Vaz-sut. Schluein Glion ei el miez dalla tabella. Sonda sera semesira Lumnezia ordeifer cun Valposchiavo e Danis-Tavanasa retscheiva Vaz-sut. Lumnezia sco Danis-Tavanasa sesanflan ella secunda mesadad dalla tabella.

El campiunadi dalla 5. ligia ha ei dau ina midada da modus. Las meglieras equipas semesiran la primavera cullas meglieras d'autras gruppas per aschia eruir tgi che vegn la fin finala

promovius. Las equipas ch'eran mintgamai ella secunda mesadad da lur tabellas, semesiran en autras gruppas.

Damas e junior(a)s cun ambiziuns

Las giugaduras da ballapei activas dalla Surselva dattan danovamein ella gruppaziun, la colligaziun dallas equipas da ballapei dalla 2. ligia cun Domat. L'equipa da 4. ligia dalla Surselva ei aschidadir la secunda formaziun da quella gruppaziun. Quei possibilitescha allas Sursilvanas d'era saver dar en ina ligia pli pretensiusa. Las junioras ed ils juniors dalla Surselva emprovan da confirmar las bunas prestaziuns digl atun. Suenter la plitost disgraziada relegaziun dils juniors A dalla pli aulta categoria regiunala (Brack Youth League) ella A1 vegnan els segiramein ad empruar da contonscher danovamein la promoziun. Medemamein vegnida relegada igl atun ei la meglia squadra dils juniors B dalla Surselva. Ella ei da veser questa primavera ella categoria promoziun ed emprova da setener leu. La categoria promoziun ei la secund'aulta regiunala. Defendiu fetg bein lur appartenenza alla categoria promoziun han igl atun vargau ils juniors C. Era els vegnan ad empruar da consolidar la situaziun, ferton ch'ils juniors D vegnan a far il pusseivel da returnar ella categoria elita. Ina sorpresa ein las junioras dalla Surselva stadas igl atun vargau. En lur emprema stagiun da campionadi ha il team FF-15 perschuadi cumpleinamein. Quella prestaziun duei vegnir confermada questa primavera en ina categoria pli aulta.